


Seiziq cei q vaiqlag, hoeng ndaw vaiqlag saekmwh hix miz siengsim caeuq nyapnyuk. Gou caemh yiengh-neix.

Geiq ndaej miz baez he, daxmeh nyib moeg, gou caeuq daegnuengx guhcaemz. Dou guh duzyiuh gaeb gaeqlwg. Gou caeuq daegnuengx cai gienz, byawz saw byawz couh dang duzyiuh. Daegnuengx saw lo, de gaeb gou. Gou haenqrengz buet, daegnuengx baenzlawz hix gyaep mbouj ndaej gou. Daegnuengx gvai, boemz youq gwnz mbonq. Gou laihnaeuz daegnuengx daej lo, couh ganjgaenj buet gvaqbae yawj. Daegnuengx sikhaek baenq ndang gvaqdaeuq gaeb gou, gou raen gou couh yaek deng de gaebdawz lo, gaenjcieng hwnjdaeuq, buet hwnj gwnz fan moeg daxmeh cingq nyib haenx bae. Daxmeh ndatheiq dwk naeuz: "Mwngz dahniq neix, caen mbouj dingqgangj. Mbouj son daegnuengx lij daiq de luenh

Daxmeh Biensim

偏心的妈妈



guh dem. Okbae, fad mwngz ndwn bakdou." Gou lau dwk lauxlaux saedsaed bae bakdou ndwn, mbouj gamj doengh saek di, ngawzsoebsoeb yawj daegnuengx swheij guh'angq. Sawqmwh daegnuengx mbouj siujsim naengh roengz gwnz moeg daxmeh bae. Gou caegcaeg riu, sim siengj: Baez neix daegnuengx hix yaek deng fad daeuq buenx gou ndwn lo. Byawz rox daxmeh dauq umj daegnuengx hwnjdaeuq, rubluh aen' gyauej daegnuengx naeuz: "Baujboiq ha, mwngz mbouj in ba?" Gangj sat lij riunyum-nyum cup daegnuengx mbat he dem. Youh gangjunq naeuz: "Bae bangx-

henz guhcaemz ba, youq neix guhcaemz rox deng cim coeg ne." Daegnuengx vaiqviet buet lo. Lij gikheiq gou naeuz: "Daxmeh, mwngz caen ndei, gou gyaez mwngz!" Gou saedcaih nyaenx mbouj ndaej lo, ndatheiq dwk naeuz: "Biensim!" Daxmeh mbouj dawz haeuj sim dwk naeuz: "Daegnuengx lij iq ne." Gou caeuq daxmeh ceng hwnjdaeuq, yienzhaeuh buet haeuj rug swheij bae daejngo'ngo. Gou daegbied haemz daegnuengx: Danghnaeuz mbouj miz daegnuengx, daxmeh haengjdingh daegbied ndiep gou. Gou doq daej doq dauqngeix gaxgonq daxmeh ndiep gou

gij vuenyungz haenx, gou geijlai maqmuengh seizgan ndaej byonj dauq gaxgonq ha! Geijlai louzlien mwh mbouj miz daegnuengx haenx ha!

Neix couh dwg sij nyapnyuk gou. Aenvih daxmeh daiq biensim lai, gou ciengzciengz caeuq daxmeh doxceng. Gou geijlai maqmuengh daxmeh mbouj biensim ha.

(haj nienzgaep Gi Yijfeih)

Dingq, Sing Fwn Seiqgeiq

听，四季的雨声

Goulau mwngz caengz haeujsim dingq gvaq sing fwn, hoeng, cijaeu mwngz sijsaeq dingq, couh rox fatyienh fwn gig gyaeundeit.

Fwn seizcin, doekcoco, couh lumj souj go unqrwenz he, hawj vunz simsangj. De baez daeuqdaengz, sawj gwnzdieg cienfanh doenghgo doihduz cungj ndiu lo, de baez vad genbuh, giz de vad gvaq haenx cungj bienq loeg lo. De dwkraemx hawj diegnamh, dwkraemx hawj lajbiengz cien loh fanh yiengh, hix hawj ndaw sim gyoengqvunz nyinhsubsub, heuloeg caeuq maqmuengh, cingq youq gak giz gak dieg ditfat.

Fwn seizhah, doekfafa, lumj gij sing hoenx gyong, hawj vunz sim baez saenz baez saenz. De couh lumj bang lajbiengz guhsaeg neix, bang gwnzdieg gij doxgaiq cungj "swiq" baez ndang ndeu, cung gij faenzuq bae, hawj daengx biengz moqsaksak. De daeuq gig vaiq, bae hix gig vaiq, daiq bae gij hwnq seizhah, soengq liengzsangj hawj gyoengqvunz. Loegheu, seizneix bienq ndaej engq loeg engq heu.

Fwn seizcou, doekcaca, couh lumj souj go mboujmiz cih saw he. De daeuq le, doenghreih doenghnaz cungj fungsou lo. De lumj dabsau he, giz neix diuq song

mbat, gizhaenx diuq song mbat—fwn yaep he doek hung, yaep he doek iq. De dawz seizhah geu hwnq cei doeksat haenx daiq byaij, soengq liengzsisi daeuq hawj gyoengqvunz. Saekhenj, caegcaeg daj ndaw fwn daeuq, de dwg daiq fungsou daeuq, daiq maqmuengh daeuq.

Fwn seizdoeng, doeksese, lumj gij singyaem ndeidingq. Ndaw seizdoeng, de gig noix daeuq, sawj de yienj ndaej gig saenzmaed. De daeuq le, nae hix daeuq riengz de, cw hoemq gwnzdieg. Saekhau, couh baij youq dangqnaj.

Biengz raeuz caen geizmiuh ha, caux ok haujlai singyaem ndeidingq hawj vunz maez. Fwn cijdwg ndawde cungj ndeu. Dingq! Sing fwn baenz raq baenz raq.....

(roek nienzgaep Cwng Han)



Seizcou Gyaundeit

美丽的秋天



Seizcou dwg aen geiqciet liengzsangj he, youh dwg aen geiqciet fungsou he.

Ndaw gunghyenz, rumz cingq yienj ok gij dinfwngz swheij. Rumz baez ci, couh miz haujlai mbawfaex loeng roengzdaeuq, Siujyez gip mbawfaex henj he hwnjdaeuq, angq dwk naeuz: "Gou aeu dawz baema guh byauhbnw." Siujvwnz gip mbaw yinzsing he, angqfwftwt naeuz: "Sou vaiq daeuq yawj, gou gip ndaej mbaw yinzsing he, gou yaek dawz baema guh ciemsaw." Haujlai vunz cungj hozhaenz Siujvwnz.

Ndaw suenmak, gig fungsou. Makbingzgoj aen gig hung, riu dwk naj cungj hoengz lo, Siujlungz ndenq din yiet fwngz bae mbaet bingzgoj. Siujlungz ndawsim siengj: "Gou yaek dawz gij mak bingzgoj hung neix baema ranz hawj daihgaya itheij gwn, caezgya itdingh gig angq."

Ndaw suenbyaek, lauxbaeg daj lajnamh con okdaeuq, lwggwz longz hwnj geu buh saekaeuq he..... Doengh gijneix cungj hawj vunz gig muenxcuk, sim'angq.

Gou raen seizcou caen gyaundeit, seizcou dwg aen geiqciet ndeigyaez ndeu.

(sam nienzgaep Cau Li)

Gienh Saeh Neix Caen Hawj Gou Hozgaek

这件事真令我气愤



Geij ngoenz gonq, daxmeh hawj gou 10 maenz ngaenz bae cawx bau gyu ndeu.

Bae daengz sanghden, ndawde miz haujlai vunz cingq cawx doxgaiq, gou siengj: Doxgaiq ndaw diemq itdingh gig ndei. Baenzneix, gou couh genj aeu bau gyu ndeu, doiq lauxbanj naeuz: "Gou cawx bau gyu neix." Lauxbanj ruihihi naeuz: "Maenz ndeu." Gou dawz 10 maenz ngaenz ndenq hawj de, de cauq dauq 9 maenz hawj gou. Youq gwnz loh maranz, gou mizdi hozhawq lo, couh dawz 5 maenz ngaenz okdaeuq cawx diuz sietdiuz he. Boux gai sietdiuz cieq aeu ngaenz baez yawj, naeuz: "Neix

dwg mbaw ngaenzgyaj ndeu." Gou mbouj saenq de, cieq gvaqdaeuq menhmenh cazyawj, cix faen mbouj ok dwg caen naeuz gyaj.

Gou youh byaij dauq daengz aen diemq haenx, siengj heuh lauxbanj vuenh mbaw ngaenzcaen dauqdaeuq, hoeng lauxbanj hozndat lo, de naeuz: "Mbaw ngaenz neix mbouj itdingh dwg gou cauq hawj mwngz ba!" Gou gig hozgaek, hoeng cix mbouj rox yawz guh ndei, cijndei ngoemxngwd dauqranz lo.

Dauq daengz ranz, gou dawz gienh saeh neix lwnh hawj daxboh nyi, daxboh

dingq le hix gig hozndat. De doiq gou naeuz: "Gvaqlaeng mwngz wnggai hag rox cazyawj ngaenzcaen ngaenzgyaj lo!" Daxboh daj ndaw daeh mbon ok mbaw ngaenzcaen ndeu caeuq mbaw ngaenzgyaj he hawj gou faenbienh. Gou sijsaeq faenbienh mbat ndeu le, fatyienh ngaenzcaen cihsaw cingcuq, ngaenzgyaj cix cihsaw myoxmbad; ngaenzcaen naj cei ngaenzwenj, dawz youq gwnz fwngz baez saenq, dingq ndaejnyi yiengjsasa; ngaenzgyaj cix unqnemnem, saenq de seiz mboujmiz sing yiengj.

Hag ndaej dauq bonjlingx neix le, gou mbouj lau caiq haeujhongx lo. Danghnaeuz caiq bungz daengz gij saeh gwnzneix, gou itdingh caeuq bouxcawjdiemq doxbuek mbat ndeu, heuh de mbouj wnggai caiq ngaek vunz lo.

(Cangh Yavaz)